



Inatsisartuni ilaasortaq Kristian Jeremiassen, Siumut
-/Maani

Qeqertarsuup Tunuani § 37 naapertorlugu apeqquut nr. 2011-209-mut akissut

09. november 2011
Sagsnr. 2011-057340
Dok. Nr. 761275

Asasara Kristian Jeremiassen

Postboks 909
3900 Nuuk
Tlf. (+299) 34 50 00
Fax (+299) 34 54 10
E-mail: iaan@nanoq.gl
www.nanoq.gl

Qeqertarsuup Tunuani timmisartuussineq pillugu apeqquutinnut qujanaq, taakkulu matuma kinguliani tulleriillugit akineqarput.

1. Decembarip aallaqqaataaniunngitsoq kisiannili 1. Oktobarimii Diskobugtimi illoqarfinni mikinerni timmisartukkut ilaasunik angallassisoqartalissappat qaammatinik marlunnik sioqqutsisumik aningaasat qanoq amerlatigisut atorneqassappat?

Decembarip ulluisa aallaqqaataaniit maajip qiteqqunneranut timmisartuussisarnermi kiffartuunneqarnissamik isumaqatigiissummut atuuttumut Namminersorlutik Oqartussat ukiumut 13,4 mio. koruuninik akiliuteqartarput. Maajip qiteqqunneraniit novembarip naaneranut imaatigut angallassinermi kiffartuunneqarnissamik isumaqatigiissummut atuuttumut ukiumut 6,2 mio. koruunit akiliutigineqartarput.

Tassalu Qeqertarsuup Tunuani imaatigut angallatit atornagit timmisartumik ilaasunik assartuussisarnerup qaammatinik marlunnik sivitsorneqarnerani aningaasartuutaanerusussat amerlangaatsiassapput.

Kisiannili aningaasartuutaanerusussat qanoq amerlatigissanersut akisinnaanngilara. Tamatumunnga isumaqatiginninniarnert aalajangersimasut apeqquutaassapput.

2. Naalakkersuisut isumaqarpat 1. Oktobari aallarnerfigalugu timmisartukkut ilaasunik angallassineq aallartitalissasoq?

Kiffartuunneqarnissamik isumaqatigiissutit nutaat, 2013-imiit atuuttussat isumaqatigiissutigineqarnerinut atatillugu Qeqertarsuup Tunuani angallanermi pissutsit allanngortinneqarnissaannut tungavissaqartoqarnerisooq Naalakkersuisut misissuiffiginiaarpat.

Kisiannili allannguisoqassappat allannguutissat aningaasaqarnikkut sinaakkusiussat maannakkut atuuttut iluanni pisariaqassapput.

3. Naalakkersuisut pilersaaruteqarpat Diskobugtimi timmisartukkut imaatigullu angallannerup siunissami akikillinissaanut?

Angallanneq – Qeqertarsuup Tunuaniinnaangitsoq, aammali nuna tamakkerlugu – akisuujummat ilumoorputit. Tamatumunngali nunasseriaaserput pissutaavoq: Innuttaasut 60.000-it nunarujussuarmi 2 mio. km²-t missaannik angissuseqartumi siaruarsimallutik najugaqarmata, assartuussinermut aningaasartuutit aamma attaveqarnermut aningaasartuutit qaffasittussaapput. Tamanna aamma sumiiffinnut isorartunnginnerusunut, soorlu Aasianniit Qasigiannuanut atuuppoq, taakkunani aningaasartuutit ilaasunit ikittunit matuneqartussaammata.

Torersaarnissaq eqqarsaatigalugu erseqqissaatigissavara, oqaatigineqareersutut kiffartuunneqarnissamik isumaqatigiissutini maannakkut atuuttuni Qeqertarsuup Tunuani imaatigut angallannermut timmisartuussinermullu ukiumut katillugit 19,6 mio. koruunit tapiissutigineqartarmata. Tassalu ilaasut bilitsit akiinut akiviusunut akiliineq ajorput.

Ilaasunik angallassinermi kiffartuunneqarnissamik isumaqatigiissutissani kiffartuunneqarnissamik isumaqatigiissutinut akiliutaasussat maannakkut aningaasaqarnikkut sinaakkusiussat amerlaqatigiinnartussaavaat. Taamaattumik Naalackersuisut ullumikkumut naleqqiullugu amerlanerusunik tapiissuteqarnissamut periarfissaqanngillat.

Neriuppunga matuma siuliani apeqqutitit akisimassallugit. Ilaasunik angallassinermut pitsannguutissanik aalajangersimasunik siunnersuuteqartoqartarnera tamatigut nuannertarpoq. Taamaattumik naggasiutigalugu timmisartuussisarnerup qaammatinik marlunnik sivitsorneqarnissaanut siunnersuutit pillugu qutsavigerusuppakkit.

Inussiarnersumik inuulluaqqusillunga

Jens B. Frederiksen